

ՔԱՂԿԱՏՄԱՆ ԵՎ ՀԵՏԵՎԱՆՔԻ ՇԱՐԱՀԱՅՈՒՄԱԿԱՆ ԿԱՐԳԵՐԸ
ՍՏՈՐԱԿԱՍԱԿԱՆ ԿԱՊԱԿՑՈՒԹՅԱՆ ՄԵՉ

թ. 2. ՎԵՐԴՅԱՆ

«Աշխարհաբարի շարահայտություն» մեծարժեք աշխատության մեջ Մ. Աբեղյանը, քննելով երկրորդական նախադասությունների շարահայտական բնույթի հարցերը, միաժամանակ ցույց տվեց բարդ նախադասության բաղադրիչների մի շարք հետաքրքրական հարաբերություններ: Ձևի և չափ ու քանակի պարագա երկրորդական նախադասությունները նա տրոհեց երեք խմբի՝ բաղադրության, հետևանքի և բացաբարձության: «Բաղադրական խոսքերը,— գրում է Մ. Աբեղյանը,— իրենց հերթին լինում են՝ նմանության, հավասարության և տարբերության»¹: Օրինակ, նմանության բաղադրական խոսքեր՝ Արա ինչպես կուգես: Սիրե աղգդ ոչ լոկ խոսքով, սիրե ինչպես քու անձը: Հավասարության խոսքեր՝ Նա նույնչափ հարուստ է, որչափ դու: Որքան մարդ կար ընկած, այնքան էլ ձի դտանք: Տարբերության խոսքեր՝ Պարապությունը ավելի է վնասում առողջությանը, քան չափազանց զբաղմունքը: Կգործենք ավելի հաշուդությամբ, քան կարող ենք երեկայել:

Ձևի և չափ ու քանակի պարագա երկրորդական նախադասությունները գլխավորի հետ կապակցվում են նաև հետևանքի հարաբերությամբ, որոնք Մ. Աբեղյանը կոչում է «հետևանքի խոսքեր»։ օրինակ՝ Նա այնպես մոլթն է խոսում, որ ես բան չեմ հասկանում: Նրա կոպիտ վարմունքն ինձ այնպես վիրավորեց, որ ես թողի, հեռացա նրանից:

Ձևի և չափ ու քանակի պարագա երկրորդական նախադասությունների արահայտման երրորդ ձևը համարվում է բացաբարձությունը, որը, սակայն, շատ սակավ կիրառություն ունի: Մ. Աբեղյանը կոչում է իր երկրորդ կեսի և XX դարի սկզբի դրական հայերենում, իսկ այժմ բոլորովին չի գործածվում:

«Բացաբարձության խոսքեր են կազմվում առանց որ շաղկապով, որ ցույց է տալիս մի հարակից հետևանքի կամ հանգամանքի շինելը,— գրում է Մ. Աբեղյանը:— Օրինակ². Անհնարին է անսպառնալից կերպով խախտել այդ ներդաշնակությունը, անհնարին է աղավաղել, խեղաթյուրել բնությունը, առանց որ այդ հանցավոր փորձի հակահարվածը նույն փորձի հեղինակի գլխին ընկներ»³:

Բաղադրության և հետևանքի հարաբերություններով նախադասությունները վերջին երկու տասնամյակում ավելի խոր ուսումնասիրության են ենթարկվել և, զատվելով ձևի, չափ ու քանակի պարագայից, դիտվել են իբրև առանձին բնույթի երկրորդական նախադասություններ՝ ա) համեմատության

1 Մ. Աբեղյան, Հայոց լեզվի տեսություն, 1965, էջ 639:

2 Բերված բոլոր օրինակները Մ. Աբեղյանինն են:

3 Մ. Աբեղյան, նույն տեղում, էջ 643:

իմաստային հարաբերություն ցույց տվող⁴ կամ բաղդատական⁵ և բ) հետևանքի երկրորդական նախադասություններ⁶։ Բաղդատական և հետևանքի կապակցություններին անդրադարձել է նաև Գ. Գարեգինյանը⁷։

Սակայն արդի հայերենի ստորադասական կապակցությունների ուսումնասիրությունը ցույց է տալիս, որ բաղդատությունը և հետևանքը մասնակի երևույթներ չեն ստորադասական նախադասության մեջ։ Նրանք իրենց արտահայտությունն են գտնում ոչ միայն բաղդատական և հետևանքի երկրորդական նախադասությունների (Ն. Պառնասյան, Վ. Առաքելյան) կամ ձևի և չափ ու քանակի պարագա երկրորդական նախադասությունների (Մ. Աբեղյան), այլ առհասարակ հայերենի բոլոր ստորադասական կապակցությունների մեջ։ Դրանք լեզվա-մտածողական այն կայուն միջոցներից են, որոնցով ձևավորվում են բարդ ստորադասական նախադասություններն ընդհանրապես։ Ընդ որում արդի հայերենի ստորադասական կապակցություններում դրսևորվում են բաղդատության բոլոր ձևերը (նմանություն, հավասարություն, տարբերություն)։ Այդ իրողությունն անմիջապես կնկատվի, եթե հայերենի ստորադասական կապակցությունները քննենք բաղդատման և հետևանքի նկատմամբ ներքով։

1 ԲԱՆՊԱՏՈՒՄ

Շարահյուսական այս կարգի միջոցով կապակցվում են գրեթե բոլոր ստորադասական նախադասությունները, որոնց մեջ արտահայտվում է որևէ հատկանիշ՝ իբրև առարկայի որակ, կամ գործողության ձև, առարկայի, գործողության կամ դրանց հատկանիշի չափ ու քանակ, աստիճան։

Գլխավոր նախադասության որևէ հատկանիշ ցույց տալու համար բաղդատում, համեմատություն է կատարվում այս կամ այն ձևով մտային աղերսակցություն ունեցող մի այլ հատկանիշի հետ, որ արտահայտվում է երկրորդական նախադասությամբ։ Այդ բաղդատումը կարող է ցույց տալ համեմատվող հատկանիշների նմանությունը, հավասարությունը կամ տարբերությունը։ Ըստ այդմ բաղդատական կապակցությունները լինում են՝

1. Նմանության բաղդատական. Այս ձևի միջոցով գլխավոր նախադասության որևէ հատկանիշ արտահայտվում է բաղդատելով երկրորդական նախադասությամբ դրսևորվող մի այլ հատկանիշի հետ՝ ցույց տալով նրանց համանման լինելը։ Ստորադասական նախադասության կապակցման համար սովորաբար գործածվում են այնպիսի-ինչպիսի, այնպես-ինչպես, այնքան-որքան, ինչքան-այնքան, այնչափ-ինչչափ, նույնը-ինչ որ, նույնը-ինչպես և նման հարաբերական ու հարաբերյալ բառեր։ Հարաբերական բառերի հետ գլխավոր նախադասության մեջ կարող են հարաբերյալ բառեր չգործածվել։ Օրինակներ՝

ա) Ստորագրելիական վերադիր երկրորդական նախադասություններով՝ Դա նույնպիսինն էր, ինչպիսին այսօր էլ տեսավ գործարանում (ՎԽՄՄՀ, 9)։ Ասածս նույնն է, ինչպես մի հարյուր հիսուն տարի առաջ նասիր-ի-խուսրաուի

4 Ն. Պառնասյան, Ստորադասական կապակցությունը արդի հայերենի բարդ նախադասություններում, 1961, էջ 141—143։

5 Վ. Առաքելյան, Հայերենի շարահյուսություն, հ. Բ, 1964, էջ 262—268։

6 Ն. Պառնասյան, նշված աշխատությունը, էջ 182—187։ Վ. Առաքելյան, Հայերենի շարահյուսություն, էջ 249—259։

7 Գ. Գարեգինյան, Շաղկապները ժամանակակից հայերենում, 1963, էջ 239—350։

տեսածը, թող խաղաղությունն անբաժան լինի նրանից (ՎԽԳԼ, 1, 22): Ես կուղևոր, որ Պոլիսը լինեի այնպես, ինչպես Երազել եմ (ՎԹԿԶԺ, 211):

բ) Որոշիչ երկրորդական նախադասություններով՝ Պրոլետարիատը նույնպիսի վճռականությամբ կմերժի այդ խորհուրդը, որպիսի վճռականությամբ Պլեխանովը առաջարկում է այդ նրան (ՍՇԵ, 1, 152): Ես քեզ էն լավությունը կանեմ, ինչ որ միայն արծիվը կարող է անել (ՀԹԵ, 2, 342): Բացանդի ճիշտ գույնակությունն արդյոք նրա՞ն ևս նույն զարմանքն ու հիացմունքն է պատճառում, ինչ որ իրեն (ՆԴԵԺ, 1, 34): Նորից ուրվեց փողոցից փողոց հալածական սրգիշը և տեսավ դարձյալ մարդկային այն բոլոր արարքները, ինչ որ տեսել էր Շիրադում (ԱԻԱԷ, 149):

դ) Հատկանիշի աստիճան ցույց տվող երկրորդական նախադասություններով՝ Բայց մահը կարող էր լինել այնքան գունաթափ, այնքան զայրացած, որպես այդ նազկի կինն էր այդ բոպեին (ԲԵԺ, 3, 125): Աչքերը կապույտ էին, ինչպես Խուլիայի ջինջ Լրկինքը, հայացքը՝ զվարթ ու անհուն, ինչպես Ադրիապիկի հորիզոնները (ՆԴԵԺ, 1, 120): Ինչ հրաշալի աչքեր, բայց լուրջ ու խոհուն, ինչպես այն եղանակը, որ մի քիչ առաջ նվազում էր նա (ՆԴԵԺ, 1, 121):

դ) Ուղիղ խնդիր երկրորդական նախադասություններով՝ Ինչ որ մեր ամբաստանված նամակի մեջ ասել ենք, նույնը կրկնում ենք այսօր (ՄՆԸԵ, 369): Հողատերերը, ազնվականները փորձեցին գյուղերում անել նույնը, ինչ որ վաճառականներն անում էին քաղաքներում (ՍՇԵ, 1, 62): Լոկ այն էր անում, ինչ որ անում էր ավազն ամանին՝ մաքրում էր ժանդից (ՊՍԱԶ, 151):

ե) Ձևի պարզապես երկրորդական նախադասություններով՝ Նրանք անխելք չեն, զավակս... միայն կրթվում են ու մեծանում են այնպես, ինչպես սարերում աճում են վայրի անասունները (ԲԵԺ, 3, 133): Ինչպես մատաղ աղջիկը ժրպտում է դղվող սիրեկանին, այնպես էլ վարդն իր շրթերն է բանում առավոտյան հուլիկին (ԱԻԱԷ, 77): Սաղավարտը քաշեց մինչև ականջները, վահանը կախեց մեջքից, ինչպես անում են նահանջի մեջ փախչող ասպետները՝ մեջքից հարված չընդունելու համար... (ԱԻԱԷ, 171):

զ) Նմանության բաղդատականի երանգ է նկատվում նաև այլ բնույթի երկրորդական նախադասությունների, օրինակ, պայմանի պարագայի դեպքում. Բարակ մեջքը վանա ծովի կարապի վիզն է կարծես, Ու թե գրկես դալար մեջքը՝ անմահության կգրես (ՀՇՍԽ): Հարաբերակցություն արտահայտող նախադասության մեջ՝ Ու որքան այդ հնչյունները դուրսիչ էին, այնքան դեղեցիկ ու հմայիչ էր ինքը՝ Անտոնիո Բոնվինին... (ՆԴԵԺ, 1, 126): Այս վերջին օրինակի մեջ կա նաև չափի հավասարության գաղափար:

Նմանության բաղդատական կապակցությունները, ինչպես նկատվում է, իրենց բաղադրիչների մտային հարաբերակցությամբ կատարելապես նույնը չեն: Երբեմն ընդգծվում է ոչ թե բաղդատվող հատկանիշների նմանությունը, այլ պարզապես նույնությունը: Այսպիսի դեպքերում զխավոր նախադասության մեջ սովորաբար զործածվում է նույն-ը հարաբերյալը, օրինակ՝ Հորս դրությունը նույնն է, ինչպես տեսնում եք նրան ամեն օր (ՆԴԵԺ, 2, 191):

Նմանության բաղդատական կապակցությունների մեջ երբեմն ընդգծվում է համեմատվող հատկանիշների համապատասխանությունը. օրինակ՝ Բայց թող Լզպես լինի, ինչպես ուղում ես (ՀԹԵ, 1, 378): Նա դործում էր այնպես, ինչպես թելադրում են նրան բնության անկախ օրենքները (ՆԴԵԺ, 2, 189):

Միայն թե տես, ամեն բան արած լինես էնպես, ինչպես ասում եմ (ՀԹԵ, 386): Թող ապրի ամեն մարդ ինչպես ուզում է (ԱԻԱԷ, 152):

Այս օրինակների մեջ երկրորդական նախադասությունները կրճատելով կստացվեն դերբայական դարձվածքներ, որոնց հետ կգործածվեն և՛ պես, նման, և՛ ըստ համապատասխան կապերը.—... քո ուզածի պես, նման (-ըստ քո ուզածի), բնության անկախ օրենքների կողմից նրան թելադրելու պես, նման (-ըստ թելադրածի, թելադրածի համապատասխան ձևով), իր ուզածի պես, նման (-ըստ իր ուզածի), իմ ասածի պես, նման (-ըստ իմ ասածի):

Երբեմն էլ գլխավոր նախադասության որևէ հատկանիշ բաղդատվում է երկրորդական նախադասությամբ արտահայտված մի այնպիսի հատկանիշի հետ, որը իրական չէ, այլ երևութական, կարծեցյալ: Այդպիսի դեպքերում երկրորդական նախադասության մեջ գործածվում են կարծես, ասես, որպես թե և նման երկբայական եղանակավորող բառեր. օրինակ՝ Այդ միջոցին նրա դեմքը պարշանքի այնպիսի արտահայտություն էր ստացել, որ կարծես լուծողական էր ընդունում (ՆԴԵԺ, 2, 52): Մայրս և բոլորն էլ հագնում էին այնպես, որ կարծես պետք է հարսանիք զնան (ՎԹԿԶԸ, 16):

Այսպիսի նախադասություններն ընդունված է կոչել կարծեցյալ նմանություն բաղդատական:

2. Հավասարության բաղդատական. Այս ձևի միջոցով գլխավոր նախադասության որևէ հատկանիշ արտահայտվում է բաղդատելով երկրորդական նախադասությամբ դրսևորվող մի հատկանիշի հետ՝ ցույց տրվելով այդ հատկանիշների հավասար լինելը՝ ըստ չափի, աստիճանի: Կապակցությունն ստեղծվում է այնքան-որքան. նույնքան-որքան, նույն չափ-ինչչափ, այնչափ-որչափ և նման հարաբերյալ ու հարաբերական բառերի միջոցով:

Հավասարության բաղդատական կապակցություններն արտահայտվում են հատկապես չափ ու քանակի պարադոս երկրորդական նախադասությունների միջոցով: Օրինակ՝ Հայոց հասարակ ժողովուրդը աղքատ է և, չունենալով ոչինչ կարողություն, հազիվհազ սերմանում է և հնձում է այնքան, որքան նորա տարեկան ապրուստը զիարդ և իցե, պիտի կարողանար ապահովել (ՄՆԸԵ, 435): Փոխարենը խոստանում է ոսկի տա՝ որքան կուզի (ՀԹԵ, 2, 482): Եվ ինչքան մոտեցել էր, այնքան հեռացավ, նորից ոտք դրեց իր ճամփին (ՎԽԳԼ, 1, 27):

Սակայն հավասարության բաղդատական կապակցություններ են ձևավորվում նաև այլ բնույթի երկրորդական նախադասությունների դեպքում, երբ բաղդատվող հատկանիշները կրում են չափ ու քանակի բնույթ: Օրինակ՝

Ստորոգելիական վերադիր երկրորդական նախադասությամբ՝ Եկեղեցու ներքին զարդարանքն այնքան էր, որքան մի գյուղական եկեղեցի կարող էր ունենալ՝ առանց ժողովրդին ավելորդ ծախքի ենթարկելու (ՄԵԺ, 2, 343): Որոշիչ երկրորդական նախադասությամբ՝ Իսկ սորա փոխանակ, ես իմ ազգի անունով խոստանում եմ ձեզանից յուրաքանչյուր զենքով զնացող անհատին աւնչափ հող, որչափ ինձ կամ իմ ազգի յուրաքանչյուր անհատին պիտի բաժին ընկնի (ՄՆԸԵ, 409—410):

Հատկանիշի աստիճան արտահայտող երկրորդական նախադասությամբ՝ Բայց էֆենդին որքան պոռոտախոս էր, որքան պարծենկոտ էր և որքան փքված սպառնալիքներ կարդալ դիտեր, այնքան էլ աղվեսի նման երկչոտ էր (ԲԵԺ,

3, 159)։ Հուսալքումը նորից եկավ տիրեց ինձ նոր թափով և այնքան ուժեղ, որքան վրեժի դժագոմս մնացել էր անհագուրդ (ՆԴԵԺ, 1, 117)։

Ձևի պարագա (չափի պարագայի որոշակի արժեքով) երկրորդական նախադասությամբ՝ ես ճանաչում եմ հորս, ինչպես ինքս ինձ (ՆԴԵԺ, 2, 176)։

3. Տարբերության բաղդատական. Բաղդատման այս ձևի միջոցով ցույց է արվում ղլխավոր նախադասության մեջ արտահայտված որևէ հատկանիշի տարբերությունը երկրորդական նախադասության մեջ արտահայտված հատկանիշից։ Եվ որովհետև հատկանիշ են արտահայտում ոչ միայն ձևի և չափ ու բանակի պարագաները, ուստի տարբերության բաղդատականը դրսևորվում է նաև այլ բնույթի երկրորդական նախադասությունների դեպքում։

Տարբերության բաղդատական կապակցության մեջ ղլխավոր կամ երկրորդական նախադասություններից մեկի ստորոգյալը (պարզ և բաղադրյալ) անպայման պետք է արտահայտված լինի ժխտական ձևով։ Եթե ժխտական է ղլխավոր նախադասության ստորոգյալը, ապա դրական ձևով պետք է արտահայտվի երկրորդական նախադասության ստորոգյալը, և ընդհակառակը։ Հատկանիշների տարբերությունը, ուրեմն, արտահայտվում է ստորոգյաների դրական և ժխտական ձևերի բաղդատման ու հակադրման ճանապարհով։ Օրինակ՝

ա) Ստորոգելիական վերադիր երկրորդական նախադասությամբ՝ Գուցե հարցնես դու. եթե միայն այլևս նույնը չես, ինչպես ես քեզ ճանաչում էի այն ժամանակ (ՆԴԵԺ, 2, 166)։ Իր շուրջն էլ փոխվում է, ինքն էլ այն չի, ինչ որ առավոտյան էր (ՀԹԵ, 1, 330)։ Այսպիսի հոբելյանների նպատակը այն չէ, որ մարդիկ հավաքվեն և աշխատեն ուրախ ժամանակ անցկացնել հոբելյարի հետ. ոչ էլ միայն այն, որ հասարակությունն առիթ ունենա շնորհակալություն հայտնելու և վարձատրելու իր մշակին (ՄՇԵ, 1, 27)։

բ) Որոշիչ երկրորդական նախադասությամբ՝ Բոլորովին նոր, բոլորովին անման րարկամության մի զգացմունք էր այս, որպիսին ես, արդարև, չէի սածել դեպի ոչ մի ժանոթն ու ընկերուհին (ՄԵԺ, 2, 374)։ Ես և մեր բոլոր բնատնիքը կորցրինք մի այնպիսի հայր, որպիսին չէր տալ աշխարհն իր բոլոր գանձերով (ՆԴԵԺ, 2, 176)։ Այնպիսի անգերազանցելի ճաշակ ունեցա, որի նմանը չունեցա իմ գարավոր վերապրումների ընթացքին այլևս (ԱԻԱԷ, 64)։

դ) Հատկանիշի աստիճան արտահայտող երկրորդական նախադասությամբ՝ Արևի վերջալույսը ոչ մի ժամանակ այնպես գեղեցիկ չէր դարձարել ամպերը, որպես այն երեկո. և լեռնային օդը իր փափուկ թարմությամբ ոչ մի ժամանակ այնքան կազդուրիչ չէր եղել, որպես այն գիշեր (ԲԵԺ, 3, 17)։ Հայրս աշխատում էր ինձ համոզել, թե մեր դրությունն այնքան աննախանձելի չէ, որքան մենք կարծում ենք (ԲԵԺ, 3, 137)։ Եվ երգեցին նրանք վերջին անգամ այնպես գեղեցիկ և շնաշխարհիկ և վսեմագին, որպես նրանք չէին երգել երբեք (ԱԻԱԷ, 43)։

զ) Ուղիղ խնդիր երկրորդական նախադասությամբ՝ էն, ինչ ձին է անում գիլի հետ, ոչ մի անասուն չի անիլ (ՀԹԵ, 1, 389)։ Այդ նշանակում է անել այն, ինչ որ շուրջդ ոչ ոք չի անում, և չի անի այն, ինչ որ շուրջդ ամենքն են անում (ՆԴԵԺ, 2, 177)։ Նրանք չեն դրել այն, ինչ որ թույլ կտան տպագրելու, այլ գրել են այն, ինչ որ չէին կարող չգրել (ՄՇԵ, 1, 31)։

Ինչպես նկատվում է, ուղիղ խնդիր երկրորդական նախադասություններն այսպիսի կապակցության մեջ իրենց արտահայտած օբյեկտի հետ միաժամանակ ենթադրում են և այդ օբյեկտի հատկանիշը՝ ինչ-որ չափով։ Այսպես, վերը

բերված օրինակների դեպքում կարելի է մտածել, որ Այդ նշանակում է անել այն գործածվել իբրև... անել այնպիսի բան. նրանք չեն գրել այն գործածվել է չեն գրել այնպիսի բան նշանակությամբ և այլն: Իհարկե, բաղդատման հանգամանքը այսպիսի կապակցությունների մեջ համեմատաբար թույլ է:

ե) Ձևի պարագա երկրորդական նախադասությամբ՝ Օձը իր բոլոր առածական դյուրաբեկությամբ չէր կարող այնպես օողալ, որպես այդ համարձակ և ճապուկ մարմինը գալարում էր խիտ եղեգնաբույսերի մեջ (ԲՆԺ, 3, 85):

զ) Ձափի պարագա երկրորդական նախադասությամբ՝ Մեզանից ոչ որայնքան չէր սիրում ու զուրգուրում մեր տունը, որքան Գոգոն (ՎԹԿՀԶ, 41): Ոչ ոք այնքան չէր կարգացել, որքան այդ փոքրիկ դալուկ տղան:

Բերված օրինակները ցույց են տալիս, որ բաղդատումը իբրև լեզվամրտածողական հանգամանք կարող է արտահայտվել ոչ միայն ձևի և չափ ու քանակի պարագա, այլև ուրիշ բնույթի երկրորդական նախադասություն ունեցող բոլոր կապակցություններում, որոնց մեջ կա առարկայի կամ գործողության որևէ հատկանիշ: Այդպես կարող է լինել ստորոգելիական վերագիր, որոշիչ, հատկանիշի աստիճան արտահայտող, խնդիր և պարագա երկրորդական նախադասությունների դեպքում:

II ՀԵՏԵՎԱՆՔ

Հետևանքի շարահյուսական կարգը կապվել է լուկ ձևի և չափ ու քանակի պարագա երկրորդական նախադասությունների հետ: Մ. Աբեղյանը հետևանքի մասին ակնարկում է նաև «Հիմունքի խոսքերի» քննության մեջ: Վերջերս հայ քերականագետներն ընդունում են հետևանքի պարագան իբրև ինքնուրույն երկրորդական նախադասություն: Այնուամենայնիվ, պետք է ասել, որ չի բացահայտվել հետևանքի, որպես խիստ ինքնատիպ շարահյուսական կարգի դերը ստորադասական կապակցությունների մեջ:

Հետևանքի հանգամանքն իր արտահայտությունն է գտնում գրեթե բոլոր ստորադասական կապակցություններում, եթե նրանց մեջ հատկապես ընդգծված չէ սուբյեկտի կամ օբյեկտի առարկայական հարաբերությունը (ենթակա և խնդիր երկրորդական նախադասություններով ստորադասություն): Կան երկրորդական նախադասություններ, օրինակ՝ պատճառի և պայմանի, որոնք գլխավորի հետ կապակցվում են հատկապես հետևանքի հարաբերությամբ: Այսպես են ստեղծվում պատճառ-հետևանքային և պայման-հետևանքային ստորադասական կապակցությունները:

Հետևանքի ստորադասական կապակցության դեպքում պարզ նախադասություններից մեկի մեջ ցույց է տրվում որևէ վիճակ, հատկանիշ, նյութական կամ բարոյական որևէ հիմունք, որի հետևանքն է լինում երկրորդ նախադասությամբ արտահայտված բովանդակությունը: Ստորադասական կապակցությունների մեծ մասի մեջ հիմունքն արտահայտվում է գլխավոր նախադասությամբ, որի հետևանքը դրսևորվում է ստորոգելիական վերագիր, որոշիչ, հատկանիշի աստիճանի, ձևի, չափ ու քանակի պարագա և հարաբերակցվող երկրորդական նախադասությունների մեջ: Գլխավոր նախադասության մեջ սովորաբար գործածվում է ցուցական դերանվամբ արտահայտված որևէ հարա-

բերյալ բառ (այն, այնպիսի, այնպես, այնքան, այնչափ և այլն), որով մատնացուց է արվում նրան հետեւող երկրորդական նախադասութեան գոյութիւնը. որպէս հետեւանքի ցուցիչ: Առանձին դեպքերում գլխավոր նախադասութեան մէջ հարաբերյալ բառ չի գործածվում, նրա դերը կատարում է գլխավոր նախադասութեան հատուկ հնչերանգը:

Ստորադասական որոշ կապակցութիւններում, ընդհակառակը, երկրորդական նախադասութիւնն արտահայտում է որեւէ հիմունք (ժամանակ, պատճառ, պայման և այլն), որի հետեւանքն է դառնում գլխավոր նախադասութիւնը: Այստեղ արդեն կատարելապէս շրջվում են գլխավոր և երկրորդական նախադասութիւնների համար ավանդական քերականութեան կողմից սահմանված դիրքերը:

Նախ քան ինչ որ այն ստորադասական կապակցութիւնները, որոնց մէջ հետեւանքն արտահայտվում է երկրորդական նախադասութեամբ:

ա) Ստորագելիական վերադիր երկրորդական նախադասութեամբ՝ Արդյունքն այն է լինում, որ օդի հոսանքի ուժգին թափից ձայնալարերն ավելի ուժգին են թրթռում (էդ. Աղայան, Լեզվ. ներած., էջ 118—119), Զարմանալի բան է, ընկեր ավագ լեյտենանտ, ասես իմ ճակատագիրն էնպէս է, որ առաջին օրն անհաջողութեամբ պիտի սկսվի ինձ համար (ՀՄՆԱ, 109):

բ) Որոշիչ երկրորդական նախադասութեամբ՝ Նա հայտնեց մի լուր, որ Ամալյային անհանգիստ դրութեան մէջ գրավ (ՄԵԺ, 2, 71): Նա է տվել թագաւորի աղջկան էն շնորհքը, որ արտասուքները մարգարիտ դառնան (ՀԹԵ, 2, 434): Իրական կերպով այս վայրկյանիս, իմ հաւերժ սիրելիս, վերհիշում եմ ահաւոր կարոտիդ սոսկալի մոնշլունը, որ դող ձգեց հոգուս մէջ (ԱԻԱԷ, 44):

դ) Հատկանիշի աստիճանի երկրորդական նախադասութեամբ՝ Եվ դուք այնքան անգութ եղաք, որ Բարդուղիմեոս առաքյալի սուրբ գերեզմանը քանդելիք, կարծելով թէ այստեղ դանձ կա թաքցրած (ՐԵԺ, 3, 53): Մորս այս հայտարարութիւնն այնքան վճռական էր, որ բոլորս էլ դողացինք (ՎԹԿԶԺ, 58): Մութ էի այնքան, որ ոչինչ չէր երևում, ոչ պատ, ոչ դուռ (ՎԽԳԼ, 1, 115): Սարկից իջնող ջրերն այնքան էին առատ, որ գրեթէ ամեն տուն առու ուներ յուր բակում (ՄԵԺ, 2, 339—340): Ասել էինք նաև, որ նրանց գլուղի եկեղեցու տակից ջուր է դալիս այնքան առատ, որ կարող էր երկու սայլ, իր եզներով, քաշել, տանել (ՎԹԿԶԺ, 100): Գելն այնքան արագավազ է, որ մի գիշերվա մէջ երեք շորս օրվա ձիու ճամփա կկտրի (ՀԹԵ, 1, 395):

Վերջին երեք նախադասութիւնները հետեւանքի հետ գուցե ավելի շատ հնարավորութեան հանգամանք են արտահայտում: Հետեւանքի հետ հնարավորութեան հանգամանք է դրսևորվում և այս կարգի որոշիչ երկրորդական նախադասութիւններով՝ Այդպէս չէ. ոչ ամենայն ընթերցող մարդ ազգի մէջ ունի այնքան դիտութիւն, որ կարողանա դատարար լինել ... (ՄՆԸԵ, 337): Ինձ այնպիսի մի հնար տուր, որ մարդու կրծքի տակի քարը իսկական սիրտ դարձնեմ (ԱԻԱԷ, 31): Ես կանգնած էի մի այնպիսի տեղում, ուստի երևում էին գլխավոր պալատը և մեծ ու փոքր Տրիանոնքը (ՄՆԸԵ, 258):

դ) Զևի պարագայ երկրորդական նախադասութեամբ՝ էնպէս դրան ես քնացնեմ, որ չղարթնի էլ հաւիտյան (ՀԹԵ, 2, 121): էնպէս զարկեց ջրաղացաքարին, Քարը եղավ հազար կտոր, Կտորները երկինք թռան Ու գնում են մինչև էսօր (Նույնը, 125): Այնպէս լիքն էր նրա հոգին սիրով և կարոտով, որ նա և արտասվել էր ուզում, և՛ ժպտալ (ԱԻԱԷ, 27): Գիշերն իջել Մովսասարին ու հովն

այնպես էր հեվում, Որ լուսնակի մայր ձեռի տակ գիշերն օրոցք էր թվում (ՀՇՍԽ):

ե) Չափ ու ֆանակի պարագա երկրորդական նախադասությամբ՝ եվ այժմ լուսավորյալ աղգերի մեջ այնքան ծաղկած է կրիտիկան, որ համարձակ կարելի է ասել, թե այդ բանը դարձած է մի ճյուղ մատենագրության և այն, շատ օգտակար ճյուղ (ՄՆԸԵ, 338): Նրա աչքերը այնքան սովորած էին այս բարբարոս ժողովրդի ցույցերին, որ ամենաշնչին երևույթից կարող էր շատ բան գուշակել (ՐԵԺ, 3, 14): Էնքան պստիկացավ, որ դառավ բղեղ (ՀԹԵ, 1, 482): Մահակն էլ մաշվել էր, մինչև բուռն էր հասել, Մի օրվա միջում էնքան էր վաղել (ՀԹԵ, 2, 102):

դ) Հարաբերակցության նախադասությամբ ընդհանրապես արտահայտվում է ելակետային-հետևանքային փոխակցությունը: Երկրորդական նախադասությունը ցույց է տալիս մի հետևանք, որ ուղիղ համեմատական է գլխավոր նախադասության մեջ արտահայտված հատկանիշին. եթե վերջինս նվազում է, նրան համապատասխան նվազում է և երկրորդական նախադասությամբ արտահայտված հետևանք-հատկանիշը, և ընդհակառակն, եթե գլխավոր նախադասության մեջ արտահայտված հատկանիշը աճում է, նրան համապատասխան աճում է և՛ երկրորդական նախադասության մեջ դրսևորվող հետևանք-հատկանիշը: Օրինակ՝

Տարիներն անցնում էին իրար հետևից, թագավորը ծերանում էր, և քանի ծերանում էր, այնքան ավելի էր հուսահատվում... (ԱԽԱ, 159): Լուրն ինչքան տարածվում էր, ատելությունն այնքան խորանում էր և փրվում (ՎԹԿՀԾ, 163):

է) Հետևանքի պարագա երկրորդական նախադասության դեպքում հետևանքը բխում է գլխավոր նախադասության արտահայտած ամբողջ բովանդակությունից: Երկրորդական նախադասությունը լրացնում է ոչ թե գլխավոր նախադասության որևէ անդամի, այլ նախադասության ամբողջովին: Օրինակ՝ Տների ներսը չէր զրավում մարդկանց, ուստի ժողովուրդը լցված էր դուրսը և դբոսնում էր սառած մայթերի վրա, կամ նոր կանաչող ծառուղիներում (ՄԵԺ, 5, 7): Փոքրիկ պատուհանը ծեփվել էր դրսից նայող հետաքրքիր դեմքերով ու պսպղուն աչքերով, այնպես որ առանց այն էլ կիսախավար խրճիթի համարյա թե մթնել էր (ՆԴԵԺ, 1, 14): Գյուտը գիտեր փորձված ծերուկի թափանցությունը նման նյութերի մեջ, ուստի և մտածեց այդ դատողության մասին (ԴԴՎ, 167): Գիշերները ցուրտ էր լինում, ուստի ամեն մի այգում խարույկ էր վառվում (ՎԹԿՀԾ, 122):

Այժմ քննենք այն ստորադասական կապակցությունները, որոնց մեջ հետևանքն արտահայտվում է, ընդհակառակն, գլխավոր նախադասությամբ, իսկ ելակետը երկրորդական նախադասությունն է, նրանով է պայմանավորված գլխավոր կոչված նախադասության բովանդակությունը:

Այսպիսի կապակցություններ ստեղծվում են՝

ա) Ժամանակի պարագա երկրորդական նախադասությամբ՝ երիտասարդը ամբողջ մարմնով դողաց, երբ նկատեց, որ կորցրել է գիշերի մեծ մասը... (ՐԵԺ, 3, 21): Ահմադը հիվանդանում էր թե չէ, մեր ուրախությունն էլ հետը կտրում էր (ՀԹԵ, 1, 348): Հրացանն արձակես թե չէ, իսկույն կհարձակվեն (նույն տեղում, 396): Երբ ժպտում էր (բայց ե՞րբ չէր ժպտում), նրա չքնաղ այտերի վրա մատնահարներ էին գոյանում և փոքրիկ բերանի մեջ, վարդագույն

շուրթերի տակ, շողշողում էին փղոսկրի պես սպիտակ ու մանրիկ ատամները (ՆԴՆԺ, 1, 120):

Բայց մանկանում է սերս միշտ, դառնում անցավ,
Երբ ևս լսում եմ վճիտ ձայնը աղջկա (ԵԶՆԺ, 1, 309):

բ) Պայմանի պարագա երկրորդական նախադասությամբ՝ Որ տեղում չբանում է աղդուծյունը, այնտեղ չբանում է նյութապես կամ բարոյապես և ինքր աղղը (ՄՆԸՆ, 349): Քանի որ մենք այսպես կլինենք, մեր վիճակը միշտ այսպես կմնա (ՐԵԺ, 3, 139): Դու եթե ամեն խոսողի լսես, երկու օր կմնաս ըստիկ... (ՄԵԺ, 4, 37): Աչքդ թեքեցիր, բանիդ տերը չես (ՀԹՆ, 2, 37):

Թե դաշտ դուրս դաս, ծաղիկների
Գորդ կդառնա քո ճամփան,
Եթե տխրես, յա՛ր, անտառի
Եղնիկները կողբան (ԳԱՀ, 187):

դ) Պատճառի պարագա երկրորդական նախադասությամբ՝ Եվ որովհետև այսօր ժամանակից ուշ էինք ճաշում, այդ պատճառով էլ ավելի քաղցած էինք (ՄԵԺ, 2, 324), Եվ որովհետև տաղանդի հետ միասին նա ուներ և գրավիչ արտաքին, ուստի բոլոր կանայք սիրում էին նրան, օրիորդները գրեթե պաշտում (ՄԵԺ, 5, 306): Քեղ չեն սիրի, քանի որ քո սրտի դաղը չկա (ԵԶՆԺ, 1, 239):

Ինչպես նկատվում է, պատճառի և պայմանի պարագա երկրորդական նախադասությունները ղլխավորի հետ կապվում են հիմնականում հետևանքի շարահյուսական կարգի միջոցով: Պատճառի և պայմանի պարագա երկրորդական նախադասությունները հանդես են գալիս իբրև մի հիմունք, որի հետևանքն արահայտվում է ղլխավոր նախադասությամբ: Այսպես, վերջին նախադասությունն մեջ.

«Քանի որ սրտի դաղը չկա» — ուստի դրա բնական հետևանքն է՝ «քեղ չեն սիրի»:

դ) Նպատակի պարագա երկրորդական նախադասությունը ևս մի նյութական կամ բարոյական հիմունք է, որդապատճառ, որից բխում է ղլխավոր նախադասության բովանդակությունը իբրև հետևանք: Ծիշտ է, նպատակի պարագա երկրորդական նախադասության գործողությունն ավելի ուշ է ենթադրվում, քան ղլխավոր նախադասության մեջ արտահայտված գործողությունը, բայց այն ելակետ է, որդապատճառ և իբրև այդպիսին տրամաբանորեն նախորդում է ղլխավոր նախադասության գործողությանը, որը միայն հետևանքն է այդ որդապատճառի: Օրինակ՝

Աքլորը մի օր կտուր բարձրացավ, որ աշխարհ տեսնի (ՀԹՆ, 1, 435): Սպասավորներն ու թիկնապահները մի կերպ զսպեցին նրանց, որ նախարարները նստեն (ԴԴՎ, 51): Վռամը ձեռքը գցեց հեռացող տղաների մեջքերին, որ առաջ մղի նրանց (ՆՈՒՆԸ, 270): Ո՞ւմ աչքն է յարիս տեսել, էն աչքին մեռնեմ, էն աչքը թող ինձ նայի, կարոտս առնեմ (Հ. Շիրազ, «Սիամանթո և Խչեղարե»):

ե) Հիմունքի պարագա երկրորդական նախադասությամբ: Այս դեպքում ևս երկրորդական նախադասությունն է ելակետը. այն արտահայտում է նյութական և

թական կամ մտավոր, բարոյական որևէ հիմունք, որից բխեցվում է գլխավոր նախադասության բովանդակությունը, իբրև հետևանք, հաճախ նաև մտավոր հետևություն, եզրահանդում: Օրինակ՝

Որպես էրևում է, դուք ձեր առաջին քաջությունը փորձել եք այդ ողորմելի շորի կտորների վրա... (ՐՆԺ, 3, 15): Դավաճան, ուխտադրուժ, թող պապանձվի քո լեզուն այսուհետև, ինչպես որ դու երգվեցիր (ԱԽԱ, 166): Չէ, ոնց որ տեսնում եմ, սրանից հետո չիբուխս էլ էլեկտրականով եմ վառելու (ԲՍԱ, 47):

զ) Հակառակ հիմունքի պարագա երկրորդական նախադասությամբ արտահայտվում է մի որևէ հանգամանք, որին, սակայն, չի հաջորդել բնական հետևանքը: Այնուամենայնիվ, գլխավոր նախադասությունը կապվում է երկրորդական նախադասության հետ հետևանքային երանգով: Օրինակ՝

Հայրս այդպիսի թեթևությամբ չէր կարող վերաբերվել դեպի իր և իր ընտանիքի երջանկությունն ու պատիվը, որքան էլ նրա մեջ բուռն ցանկությամբ գործեր խաղալու սերը, մոլությունը (ՆԴՆԺ, 2, 176): Եվ շնայած որ անթիվ դարեր են անցել, Նույնն է երազը նրա, լոկ մարմինն է ծեր (ԵԶՆԺ, 1, 278): Որքան որ մայրս սարսափում էր աղավնուց, բայց էլի լավ բաները նմանեցնում էր աղավնու (ՎԹԿՀԸ, 190): Այդ օրվանից Վռամը թեև շատ էր ման եկել այգիներում և խիստ հոգնած, ջարդված էր, բայց, այնուամենայնիվ, չէր ցանկանում գրասենյակից դուրս գալ (ՔԹՈՀ, 223):

է) Հարաբերակցության նախադասությամբ՝ Որքան մոտենում էր երիտասարդը, այնքան հիշյալ առարկան աճում և ավելի մեծ ծավալ էր ստանում (ՐՆԺ, 3, 24): Քանի գեղին մոտենում ենք, գեղերը ետ են ընկնում (ՀԹՆ, 1, 40): Ոնց որ դու ինձ համար կարմիր ծաղիկ բերել ես ու ընկել փորձանքի մեջ, էնպես էլ ես պետք է աղատեմ քեզ այդ փորձանքից (ՀԹՆ, 2, 484):

Ինչպես նկատում ենք, հետևանքը, իբրև շարահյուսական կարգ, հատուկ է ոչ միայն ձևի, չափ ու քանակի և հետևանքի, այլև ուրիշ բնույթի երկրորդական նախադասություններ ունեցող ստորադասական կապակցություններին: Ավելին, հետևանքը հաճախ արտահայտվում է և գլխավոր նախադասության միջոցով, որի համար երկրորդական նախադասությունը հանդես է գալիս իբրև ելակետ, նյութական կամ բարոյական հիմունք, դրգապատճառ: Այսպիսով՝ հետևանքը ոչ թե մասնակի, այլ ընդհանրական կարգ է, հատուկ ստորադասական գրեթե բոլոր կապակցություններին, այն չի կարելի կապել որևէ առանձին բնույթի երկրորդական նախադասության հետ:

Հայոց լեզուն անսահման նյութ է տալիս պնդելու, որ ստորադասական կապակցությունների ուսումնասիրության դեպքում պետք է հաշվի առնել ոչ միայն երկրորդական նախադասությունների բնույթը և կապակցող բառերը (շաղկապներ, հարաբերական ու հարաբերյալ բառեր), այլև բարդ նախադասության կազմի մեջ մտնող պարզ նախադասությունների մտային փոխհարաբերությունը բաղդատման, հետևանքի և այլ միջոցներով: Բաղդատումն ու հետևանքը այնքան օրինաչափ են և ընդհանուր ստորադասական բոլոր կապակցությունների համար, որ դրանք կարելի է կոչել շարահյուսական կարգեր:

Կարելի է մտածել, որ դրանք տրամաբանական կարգեր են: Իրոք, մտածողությունը խիստ հատուկ են և՛ բաղդատումը, և՛ հետևանքը, որպես բարդ դատողությունների ստեղծման միջոցներ: Բայց, այսուհանդերձ, դրանք նաև քերականական կարգեր են, որովհետև դատողական այդ միջոցները ստանում են իրենց լեզվական ձևավորումը: Դա մասնավորապես վերաբերում է հատ-

կանիշների բաղդատմանը, երբ գլխավոր և երկրորդական նախադասությունները կապակցվում են համապատասխան հարաբերյալ ու հարաբերական բառերի միջոցով, Այսպես, նմանության բաղդատական կապակցությունների դեպքում՝ նույնը-ինչ ու, նույնը-ինչպես, նույնպիսին-ինչպիսին, նույնպիսի-որպիսի, այնպես-ինչպես, այնպես-որպես և այլն: Հավասարության բաղդատական կապակցությունների դեպքում՝ այնչափ-որչափ, այնքան-որքան, այնքան-ինչքան: Տարբերության բաղդատական կապակցություններին բնորոշ է այն, որ եթե գլխավոր նախադասության ստորոգյալը արտահայտված է ժխտական ձևով, ապա երկրորդական նախադասության ստորոգյալն անպայման պետք է լինի դրական, հաստատական ձևով, և ընդհակառակը:

Երբ երկրորդական նախադասությունները ցույց են տալիս գլխավոր նախադասության բովանդակությունից բխող մի հետևանք, կապակցությունն ստեղծվում է հետևանք արտահայտող ու, ուստի, ուստի և, այնպես ու և նման ստորադասական շաղկապների միջոցով: Միայն այն դեպքում, երբ հետևանքն արտահայտվում է գլխավոր նախադասության միջոցով, կապակցությունն ստեղծվում է հետևանքի համար ոչ բնորոշ, ընդհանրական նշանակություն ունեցող որոշ հարաբերական բառերի ու ստորադասական շաղկապների միջոցով՝ երբ, որպես, ու, թե, եթե, որովհետև, որպեսզի, որքան ու այլն:

Այս բոլորը թույլ են տալիս պնդելու, որ բաղդատությունը և հետևանքը ինչպես տրամաբանական, այնպես և շարահյուսական, քերականական կարգեր են: Կաղմավորելով բարդ դատողություններ՝ նրանք ստանում են լեզվական իրենց որոշակի, ինքնատիպ ձևավորումը:

Կա՞ն բարդ նախադասությունների համար բնորոշ շարահյուսական և այլ կարգեր: Անշուշտ կան, և դրանց րացահայտումը լեզվաբանության կարևոր խնդիրներից մեկն է:

ՀԱՄԱՌՈՏԱԳՐՈՒԹՅՈՒՆՆԵՐ

- ԱԻԱԷ — Ա. Իսահակյան, Արձակ էջեր, Երևան, 1963:
 ԲՍԱ — Բ. Սեյրանյան, Աղբյուրներ, Երևան, 1953:
 ԳՍՀ — Գ. Սարյան, Հատընտիր, Երևան, 1945:
 ԴԴՎ — Դ. Դեմիրճյան, Վարդանանք, Երևան, 1951:
 ԵԶԵԺ — Ե. Զարենց, Երկերի ժողովածու, 6 հատորով, Երևան, 1962—1967:
 ՀԹԵ — Հ. Թումանյան, Երկեր, 2 հատորով, Երևան, 1958:
 ՀՄՆԱ — Հ. Մկրտչյան, Նովելներ և ակնարկներ, Երևան, 1947:
 ՀՇՍԽ — Հ. Շիրազ, Սիամանթո և Խեղարե, Երևան, 1958:
 ՀՇՔՀ — Հ. Շիրազ, Քնար Հայաստանի, Երևան, 1958:
 ՄԵԺ — Մուրացյան, Երկերի ժողովածու, 7 հատորով, Երևան, 1956:
 ՄՆՂԵ — Մ. Նալբանդյան, Ընտիր երկեր, Երևան, 1953:
 ՆԴԵԺ — Նար-Դոս, Երկերի ժողովածու, 2 հատորով, Երևան, 1955:
 ՊՍԱԶ — Պ. Սևակ, Անլուրի զանգակատուն, Երևան, 1966:
 ՍԶԵԺ — Ս. Զորյան, Երկերի ժողովածու, 10 հատորով, Երևան, 1960-1963:
 ՍՇԵ — Ս. Շահումյան, Երկեր, հ. 1, Երևան, 1957:
 ՎԹԿՀԺ — Վ. Թոթովենց, Կյանքը հին հոմեական ճանապարհի վրա, Երևան, 1966:

- ՎԽԳԼ — Վ. Խեչումյան, Գիրք լինելության, վ. 1, Երևան, 1966:
 ՎԽՄՄ — Վ. Խեչումյան, Մեզ ճոտ հարավում, Երևան, 1955:
 ՎՏԵԺ — Վ. Տերյան, Երկերի ժողովածու, 3 հատորով, Երևան, 1960—1963:
 ԲԵԺ — Բաֆֆի, Երկերի ժողովածու, 10 հատորով, Երևան, 1962—1964:
 ՔԹՈՀ — Ք. Թափալցյան, Ոսկե հովիտ, Երևան, 1955:

СИНТАКСИЧЕСКИЕ КАТЕГОРИИ СРАВНЕНИЯ И СЛЕДСТВИЯ В СЛОЖНОПОДЧИНЕННЫХ ПРЕДЛОЖЕНИЯХ.

Б. А. ВЕРДЯН

Р е з ю м е

В армянском грамматиковедении сравнение и следствие были рассмотрены либо как формы выражения придаточных предложений образа действия и количества (М. Абемян), либо как самостоятельные придаточные предложения сравнения и следствия (В. Аракелян, Н. Парнасян).

В статье на многочисленных примерах показывается, что как сравнение, так и следствие выражаются во всех сложноподчиненных предложениях, где в какой то форме показывается качество предмета, действия или степень какого-либо качества.

Сравнение выражается в трех видах—сходства, различия и равенства. Все виды сравнения и следствия выражаются соответствующими относительными словами или союзами и потому они не могут считаться логическими формами. Как сравнение, так и следствие можно считать синтаксическими категориями в современном армянском языке.